

Chido Quilotte:

Mi recuerdonan di e cantica "Aruba Dushi Tera" prome y despues cu el a bira nos Himno Nacional

Na aña 1953 mi tabata un di e prome miembronan di e grupo juvenil "De Trupialen", cu a cuminsa como un koor. Nos tabata ensaya den nos club y varios biaha señor Padu del Caribe y señor Hubert Booi tabata bin den club ora cu e muchanan tabata train. Ningun di nos por a pensa cu den futuro un di e canticanan cu nos tabata ensaya lo bira e himno nacional di Aruba y cu e dos personanan menciona hunto cu Frere Alexius lo yuda den esey.

"De Trupialen" a cuminsa trece e cantica pa publico. Nan tabata cante na tur presentacion y aubade. Frere Alexius a laga pone speakers den e klasnan 1 te cu 6 y tur diabierna merdia tabata toca canticanan na papiamento y naturalmente "Aruba dushi tera" tabata entre nan. E cantica a bira conoci. E miembronan di "De Trupialen" tabata sabie for di nan cabes. Hasta mi tata tabata tin e den su repertorio pasobra tur atardi e tabata toca su cuarta y fluit e melodia.

E di dos recuerdo ta di November 1960 tempo cu, danki na Toeristenbureau, Aruba

Caribbean Hotel y Trans Caribbean Airways, un delegacion a bay Puerto Rico pa haci propaganda pa Aruba y laga nan sera conoci cu un parti di nos cultura. E delegacion tabata bao direccion di señor Hubert Booi.

Mi a participa como miembro di un grupo di baile bao guia di defunto Geechi Pietersz.

A bay tambe den e delegacion Padu del Caribe, Trio Los Aventureros, y un Caha di Orgel.

Un di mi ruman-nan, Dolfi, tambe a forma parti di e grupo di baile, y door cu e tempo ey e tabata un cantante conoci, e mester a canta "Aruba dushi tera" durante tur presentacion na convencion, radio y television (caminda tabata tin un programa di un ora tocante Aruba). Na Ramey Air Force Base tambe "Aruba dushi tera" a worde canta dilanti di un publico di 3000 hende. Trio "Los Aventureros" a percura pa e compañamento. E resto di e delegacion cu tabata tras di cortina, a lo largo, a siña e cantica fei cabes door di scuche tanto biaha. Ora nan tabata reuni y canta semper e

cantica ey tabata bin dilanti.

Dia 18 di maart 1976 a bira e dia grandi y historico pa Aruba. "Aruba dushi tera" a bira oficialmente e himno nacional di Aruba y e anochi ey e bandera di Aruba a worde hisa.

E momento ey tabata inolvidabel pa tur presente. Mi tambe tabata den e multitud na stadion. E publico a keda keto. Joy Kock a duna señal pa e orkestra sinfonico di Aruba toca e prome tonada di e himno y Maybelline Arends-Croes a hisa su man pa e coro cuminsa cu e prome palabranan. Mi a cuminsa canta e himno, mi no tabata tin mester di papel pasobra ya mi tabata sa tur e palabranan y tambe e couplet cu a bin acerca.

E publico tambe tabata canta y na e momento ey mi tabata purba pa mi stem sali riba di tur hende. Asina mi tabata sinti.

Weitando, na e mesun momento, e bandera bay halto den e luz di e spotlightnan, tabata pa mi algo di otro mundo. Mi pianan tabata tembla, mi curazon tabata bati mescos cu un motor den mi pecho y mi garganta tabata cerca di rementa.

Ora cu e bandera a yega na top, cu e spotlightnan riba dje, e himno a yega na su fin. Un momento historico pa Aruba henter. Nos a haya nos bandera y nos himno. Mi mester a saca lenso pa seca awa di wowo. E anochi ey casi mi no por a drumi di emocion.

Di cuater biaha cu mi tabata

tin un encuentro emocional cu nos himno tabata na New York. Un delegacion di 20 persona, entre otro un grupo di Mascaruba, Trio Huasteca, Caha di Orgel di defunto Pedro Croes y Chen Croes, a viaha cu "Nochi Rubiano" pa New York di 8 te cu 11 di December 1976 bao direccion di Oslin Boekhoudt. Ami tabata den e grupo di baile.

Na cuminsamento di e "Nochi Rubiano" henter e delegacion a subi escenario pa canta nos himno. Den e publico tabata tin un señora, ex-miembro di Mascaruba, biba varios aña na New York. Esnan den e delegacion a mira cu e señora a cuminsa yora ora cu el a tende nos himno pa prome biaha y nan garganta a dal sera di emocion loke a haci dificil pa sigui canta y lensonan a cuminsa sali for di saco. Tabata un momento emocionante.

Mi di cinco encuentro emocional cu nos himno tabata na bordo di un aeroplano di American Airlines riba nos vuelo back pa Aruba. Tur e 20 personanan di e delegacion cu a bay New York a cuminsa canta nos himno loke a impresionar tur e pasaheronan. Pa prome biaha e nubianan a sinti nos himno

asina cerca y canta cu asina un emocion y orgullo.

Na Hulanda tabata mi di seis encuentro emocional cu nos himno. Mi a bira malo y mi

tabata na cas recuperando. Frere Alexius ta yama mi na telefoon y den combersacion e ta puntra si mi por canta, ya cu papia mi no por a papia mucho bon. Mi a bise cu mi no tabata por. E ora Frere a cuminsa canta "Aruba dushi tera" y mi a canta hunto cu ne, sin problema y cu awa na wowo. Tabata prome biaha, despues cu mi a bira malo, cu mi a canta y for di mi cabes. Frere a bisa mi pa sigui cu un otro cantica y e mes a cuminsa cu "Hoor de Trupialen zingen" y mi por a canta esey tambe cu ne. Pero na final mi no por a wanta mas y mi a cuminsa yora. Frere a pone mi canta nos himno y e cantica di "De Trupialen". Tur dos tabata nifica hopi pa mi.

Pa finalisa: e bandera di Aruba. Dia cu nos a bolbe di Hulanda, na momento cu nos a yega nos cas, nan ta muestra mi parti panord di nos cura caminda tabata tin un palo di bandera cu bandera di Aruba. Yen di emocion mi a coi e bandera brasa y m'a sunchi e bisando e palabranan: Danki mi Dios cu bo a laga mi bolbe mi tera sano y salvo.

TELEFONNAN DI DIARIO
826747- FAX 828551